

Haben wir en entlichen durch Mgrm Hioannem Frawenburg dy zzeit vnnsern Stadtschreyber dysen nachfulgenden ausssatz gethan. Den er dann In sulchen Worten verzcalt had.

Lieber Er Hauptman vnnnd lieber frund von der Ritterschafft, So ir kommet vnnnd zu Irkennen gebet, wy ir mit vns In eyn vnd gut vornehmen gerne kommen wellet, vnnnd vnns gebethen uch einen aussatz zuthuen, damit er deme so nachkemet. Haben mir meyne Herren, Bürgermeister vnnnd Rathmanne entpholen uch disen ausssatz zcuthun verzcelin vnnnd vorzcusetzen. Vnnnd stehet ir meynung also:

Das sy meynen getrewlich, früntlich vnnnd nachbarlich sich gein uch zcuhalten: als dann jr vorfarn vnnnd sy gein uwre vorfarn vnd uch sich gehalden haben, vch trawe fruntschafft vnnnd gutten willen Im felde adder wo sich das hysche, leysten. Vnnnd welden vngerne anders thuens gein uch vermerkt werden. Ouch vbir uch allen samptlich vnnnd yeglichem sündlich in anfechtung haldin, In allen billichen vnnnd geborlichen sachen vngeferlich.

Vnnnd ap ein teyl geym andern, als lannd geyn Stadt vnnnd Stadt geym landt gebrechen hetten, das dy In rwe blybenn vnnnd In gutter meynung eyn anstehenn hetten, biss so lange dy ding Ir beqwemer zzeit, möchten (haben) welchem teyle diss not were, Irkannt werde. Vnnnd ap meyne Herrn des Raths so jrkeyne gebrechen gein uch habin wurden: Ist meyner Herrn meynung dy vor an uch zcu tragin, do versuchin zcu haben, ap dy ding Inn fruntschafft mochten abegetragen werden. Geschege diss nicht, wurden sy wol wissen, wo dy ding zcusuchin vnnnd vorzcunehmen.

Lieben fründ, diss ist meyner Herrn ausssatz, vnnnd meynen das sy so jr en allenthalben so ferre widder zcusagin werdet, do durch mit uch Inn eyn vnd gut vornehmen qwemen.

Doruff haben sich dy Manne bespruchen vnnnd gesagt, das sulcher ausssatz en gar wol gefyle. Vnnnd haben gebeten, wir weldenn jnn den dingen eyne kortzen auffschlag machen, biss sy den ausssatz an dem gemeynen Man brechten. Suldin wir Inn keynen zcwieuel setzen, er würde en wolgefallen. Vnnnd sy würden widder gein vns sulche zcusage thun.

Actum coram Mgro ciuium et dominis Scabinis, anno lxxx<sup>o</sup>. proxima feria post festum sancte et indiuidue Trinitatis. 18/5 C. Ex parte vasallorum presentibus Caspate Nostitz, Andrea Tucheritz, Johanne seniore de Dobeschitz et aliis presentibus in hec a Vasallis negocia vocatis.

(21. Nouembr. h 1587.)